

GV ISSV, 9. 11. 2013

Verabschiedung des Präsidenten Andreas Iten

„Was hatte Iten zu bieten?“

Eine ziemlich humoristische Laudatio
von Osy Zimmermann

Osy tritt auf und setzt sich ans Klavier.

OSY Jo, nei, sell i ächt denn vo linggs ine cho oder vo rächts? Was wär im Andreas ächt lieber?
Loni no offe.
Und denn spieli zerscht es paar Tächt. Ächli Musig isch immer guet.

Notiert sich diese Idee.

Aber was?

Spielt einen Tango an.

Tango, Tango... Weiss nid öb ihm de Tango rächt wär.

Notiert: „Ist Iten ein Tangotyp?“

Spielt erneut ein Chehrli.

Scho ehnder volkstümlich. Der Iten muess volkstümlich sii, süsch wär er als Politiker doch gar nie gwählt worde...

Zuerst ein paar Akkorde auf dem Instrument. Die Melodie des Ägerisee-Liedes kurz aufblitzen lassen.

Lohni no offe!

Schaut auf seine Notizen.

„Was hat Iten zu bieten?“

Wem isch au dee Titel i Sinn cho? - Mir sälber, ich weiss!

E Laudatio...!

„Was hatte Iten zu bieten?“

Natüerli e Huufe! Aber das sägid sicher scho mini Vorredner. Ich beschränk mi glaub uf d Musig.

Spielt ein paar Takte.

OSY Ich chönnt jo Froge stelle.

Denkt sich Fragen aus.

- Werum isch sone katholische Burscht zum Freisinn?
- Isch de frei Sinn vom Andreas Iten für die Freisinn nid öppedie ächli z frei gsi?
- Wie haltet s e Ma mit so vile Inträsse, Begabige und Chönne überhaupt us i dem chliine, änge Kanton Zug?
- Und wie hed s e Ma mit so vile Inträsse, Begabige und Chönne überhaupt usghalte i dem chliine, änge Bundeshuus z Bern obe?

Osy macht sich Notizen

Froge über Froge. Aregig über Aregig.

z.B.

- Wie cha eine, wo pädagogisch gschuelt und inträssiert isch, überhaupt i d Politik iistiige? Und de das no mit Herzbluet? Und erfolgriich?
- Wieso hed er schliessli d Leitig vo dere Sälbsthilfegruppe übernoh: s Präsidium vom ISSV?
- Cha der ISSV ohni Iten überhaupt no existiere?

Das lohni offe.

Ich chume nid wiiter.

Ich säge em ISSV ab. Ich cha kä Laudation ha. Scho gar nid e humoristischi. Und no weniger über der Iten. ‚Ich habe nichts zu bieten!‘

Steht auf und will gehen.

Hat eine Idee.

OSY Allefalls chönt i öppis singe. Er hed doch do i siim letschte Buech...

Er sucht das Buch hervor.

Do Siite 24.

Zitiert aus dem Buch.

„....“

Sing ich ihm halt das Lied vom Ägerisee.

Evtl. mit Einschüben von anderen (passenden) Heimatliedern.

Lied vom Ägerisee

Text und Komposition Thomas Nussbaumer

1.

Lueg au d'r Ägerisee!
Wo chönscht e schön're gseh
uf all dem Erderund,
so wyt as d'Sunne chund?
Und ringsum isch e Pracht,
dass s'Härz im Lyb eim lacht,
grad we vom Herrgott selber gmacht

Hal – li – a - ha – li – o,
ha – li – a - ha – li – o
ha – i – hol – dri –
ha – li – a – hol – dri – o
ha – li – a ha – li – o
hal – i – a – ha – li – o;
grad wie vom Herrgott selber gmacht.

2.

Isch grünen we Maiegras;
isch glatt we Spiegelglas,
dass all die Berg ringsum
in ihm sich spieglet drum.
Trifft ihns dr Sunnstrahl,
schickt er zu Berg und Tal
e Glascht und Glanz, we ke Kristall

Ha – li – a – ha – li – o...
e Glast und Glanz we ke Krystall.

3.

Jetzt lyt er ruohig do;
doch chas au andrischt cho,
wenn üse Hinderwind
verblast d Ägeri-Chind.
Die Töchter und die Söhn
Stönd use i de Föhn
Es sprützt und chuutet, wunderschön

Ha – li – a – ha – li- o..
Es sprützt und chuutet, wunderschön

4.

Er stood am Ägerisee
Der Iten chasch deet gseh,
Wo uf und ab spaziert
Er sig schiints pangsoniert
Er freut sich Tag und Nacht
Am See und sinere Pracht
as wärs für ihn vom Herrgott gmacht.

Ha – l – a – ha – li – o..
as wärs für ihn vom Herrgott gmacht.

5.

Er stood am Ägerisee
Und hed scho wider en Idee
Fasch wine Art Reflex
Für irgend no en Text
Für e Kolumne gar
Für sini Läserschar
Isch er e Star ganz wunderbar

Ha – l – a – ha – li – o..
Isch er e Star ganz wunderbar

OSY Sell ich das ächt singe a dere Verabschiedig?
Lohni no offe!

Geht ab.

Ende.